

02 JUL 1996

Mahathir-Anugerah

DR MAHATHIR TERIMA ANUGERAH TERTINGGI URUGUAY

KUALA LUMPUR, 2 Julai (Bernama) -- Datuk Seri Dr Mahathir Mohamad hari ini dianugerahi pingat "Knight Commander" kategori kedua oleh Presiden Republik Uruguay Dr Julio Maria Sanguinetti.

Perdana Menteri menerima pingat itu ketika mengunjungi Sanguinetti yang tiba hari ini untuk lawatan negara empat hari, di Carcosa Seri Negara di sini.

Kategori kedua pingat itu merupakan anugerah tertinggi Uruguay kepada ketua-ketua kerajaan asing. Sanguinetti akan menyampaikan kategori pertama pingat itu yang dikhususkan kepada ketua-ketua negara asing, kepada Yang di-Pertuan Agong Tuanku Jaafar esok.

Lawatan Presiden Uruguay itu disifatkan oleh para pegawai sebagai satu daripada usaha mempereratkan hubungan dua hala selain meningkatkan kerjasama ekonomi.

Ia merupakan yang pertama bagi seorang ketua negara republik berkenaan sejak Malaysia dan Uruguay menjalin hubungan diplomatik pada 1987.

Lawatan beliau dan isterinya, Prof Dr Marta Canessa Sanguinetti adalah hasil undangan Yang di-Pertuan Agong Tuanku Jaafar yang mengunjungi Uruguay pada September tahun lepas. Ia disusuli lawatan kerja oleh Dr Mahathir dua bulan kemudian.

Sanguinetti dan rombongannya yang mengandungi beberapa menteri dan pegawai kanan kerajaan akan mengadakan perbincangan dengan Dr Mahathir.

Kedua-dua negara dijangka menandatangani perjanjian kerjasama ekonomi, saintifik dan teknikal, perjanjian kerjasama dalam bidang perubatan veterinar dan perjanjian dalam bidang fitosanitari.

Sanguinetti dijadual berucap pada seminar perniagaan anjuran bersama Dewan Perniagaan dan Perindustrian Kebangsaan, Persatuan Selatan-Selatan Malaysia dan Kedutaan Uruguay.

Rombongan itu akan mendengar taklimat pembangunan di Unit Perancang Ekonomi dan melawat kilang Proton di Shah Alam.

Ketibaan Sanguinetti di Lapangan Terbang Sultan Abdul Aziz Shah disambut oleh Menteri Luar, Datuk Abdullah Ahmad Badawi.

Presiden Uruguay dan rombongannya itu kemudian disambut secara rasmi di Dataran Merdeka oleh Yang di-Pertuan Agong Tuanku Jaafar. -- BERNAMA

AH MAI